

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



## FAAVAEINA 1839 O LE SULU SAMOA IANUARI 2025

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)



*Fono Sui o le Pasefika (MMF), o le FGFL, usua Malua 19 - 22/1/2025 (ata a le FGFL)*

## *VASEGA TAUSAGA MUAMUA, MALUA 2025*



*A'oa'o ma Faletua i le Ta'utinoga, sauni ai mo le a'e i le Kolisi Faafaifeau Malua.*

---

## **O LE FAASINO UPU**

1. O LE LAUGA.....2
  2. TALI MALO MALUA I LE FGFL.....4
  3. EFKS VAIALA.....5
  4. A’OA’O MO MALUA.....5
  5. O LAU AFIGO O LE SULU.....6
  6. O LE PEROFETA MULIMULI.....8
  7. O E UA FAI I LAGI FOLAUGA.....15
  8. ATA O TOA UAMALILIU.....16
- 

## **O LE LAUGA**

Matua: 2 Samuelu 12: 6, “*A o le tama’i mamoe, na te tau’i atu lea i mamoe e fa, ina ua na faia lena mea, ma ua lē alofa.*”

Manatu Aoa Vaiaso: MAMOE MA LEOLEO MAMOE  
(Aso Sa Tupulaga) O LE MALOSI/PAOA, O LE MAMOE UA ALOFAINA (The power of the loved sheep)

Fai mai se tasi alii, “O le faafitauli, e lē o le fa’aaogā sesē o le paoa; a o le paoa e fa’aaogā sesē ai.” (The problem is not the abuse of power; it is the power to abuse.)

O le malosi, malosiaga, po o le paoa, o se faamanuiaga e o faatasi ma se tofiga, aemaise o se tofiga e ta’ita’i. Pe o totonu o aiga, o faiganuu, o faigamalo, o Ekalesia, ma soo se ituaiga faalapotopotoga, o ai ua ave ma ulu, ua tofia i le tulaga faata’ita’i, e tuu faatasi i ai ma le pule, o mamalu, ma le malosiaga, poo le paoa. Faatasi ma isi faamanuiaga, o vaega uma lava o le tofiga. E leai se ta’ita’i, po o se ulu e aunoa ma se paoa e tuu i ai, e tusa ma aiaiga, o faiga faavae poo tulafono, e faatautaia ai lona tofi. Fai mai Paulo ia Roma, “*Ia usiuitai tagata uma i faipule silisili, auā e leai se pule pe a le mai le Atua.*” O le pule ma le paoa, o mea lelei, mai le Atua, mo le manuia o tagata uma. O le malosi e faatonutonu ai lana pule, o mea e finagalo ai, mo le ola manuia, soifua lelei, o lona aiga, lona

atunuu, po o lana Ekalesia. E lē o se mea leaga le paoa. E pei lava foi o le paoa faaeletise, o se mea lelei ma aogā, se’i vaganā ua sesē ona fai, ona sipaka loa lea ma paoa off. Faato’a leaga ma ave ma agasala, ina ua sesē lona fa’aaogaina, ua soona fai, ua ova, e lē tusa ma aiaiga, ua sala ese ma tulafono e faatonutonu ai, ua solia ai faavae, ua feteena’i ma le finagalo o le Atua.

E lē masani ona maua e tagata lautele, lea faamanuiaga o le malosi, po o le paoa. E le agavaa ai le vasega o tagata vaivai, tagata matitiva, tagata faatauvaa ma lē taualoa, le vasega e leai se leo po o se manatu, le vasega e tele ina sauaina ma olopalaina, ona o le pule soona fai ma le paoa fai sesē. Peita’i, e mafai ona fesuia’i le faatulagaina o le pule, ma le paoa, pe a lē faamalieleina tagata lautele, ina ua tetele le sauāina, le taotaomia, ma le faapologaina. E i’u ina tete’e, pe fouvale, e o’o ina tula’i atu, ma latou pulea ai, faiganuu ma faigamalo, e tula’i mai ai Toefuataiga. E manatua le lauga ta’uta’ua a le alii faifeau Amerika o Matini Luteru Kini, “E i ai la’u miti/I have a dream.” Le lauga na faamaite ai le taofia o le faatau ma faapologa o tagata uli i Amerika, ma le saolotoga e agavaa ai e palota.

O le faataoto a le perofeta o Natano na faamatala ia Tavita, e faasino i le paoa ma le pule a le mau’oa, na ia ave faamalosi ai le tama’i mamoe fafine e tasi, a si tagata mativa. Le tama’i mamoe na faatau, ma tasi faatasi ma si ana fanau, e aai i le ipu e tasi, momoe faatasi, e afisi i lona fatafata, e pei o se afafine pele. A e ina ua fai le pule sauā, ma fa’aaogā le paoa soona fai ma le lē alofa a le mau’oa, na ia ave lava si tama’i mamoe, ua fasi ma tali ai ana malo, e ui ina sa tele ana lafu mamoe ma lafu povi. Ave atu lava si tama’i mamoe, o pulapula mata o si mativa aunoa ma sona leo, o fetagisi si fanau aunoa se finauga. Ave le tama’i mamoe, ua ta’ita’iina ia fasia, ua lē tautala mai, fasia faatasi ma loimata o le mativa.

Soo se tagata e i ai le mafaufau e lelei ma sagatonu, e tasi a lana faalogo, ona iloa le leaga o le mea ua fai, ma lagona le tiga alofa. Ma ina ua faalogo Tavita i le faataoto, na tuia lona fatu - i le tasi itu na tuia i le alofa i le tagata mativa, o lona alofa lava lea i le tama’i mamoe ua fasia; a o le isi itu, na tuia foi ma mū i le inoio ma le ita

---

tele i le mau'oa. Na ia iloa le faamasinoga tonu e tatau ona fai. Ua talafeagai ona sala oti le mau'oa; e lē lava ana 'oa e totogi ai se sala tupe, e lē lava foi aso o totoe o lona ola, e soloatoa ai i le falepuipui. Na o le oti lava e fetau ma le ituaiga amioleaga lē alofa, ua ia faalogo atu ai. Pe sa manatu Tavita e saili mai nei lava le mau'oa poo ai. A e fai mai le perofeta o Natano, Tavita, o oe lava le tagata, o oe lava le mau'oa amio leaga, pule sauā, lē alofa, e tatau ona sala oti. O le faataoto, na a'oa'i ai e le Atua, lana auauna le tupu o Tavita, i lana agasala, na ia fasioti ai Uria, a e ave faamalosi Patesepa, e fai mana avā.

O le a lē afaina nei, le itu ia Tavita ma lona faamasinoga. A e fia tuliloa ma faamamafa le autu, i le malosi poo le paoa, o le mamoe ua alofaina. O le malosi lava lea, poo le paoa, e maua e le tagata mativa, le tagata vaivai, le vasega o i latou na sauaina, olopalaina ma faapologaina, ona o le pule sauā ma le paoa soona fai a isi tagata. ***A o le tama'i mamoe, ia tau'i atu i le tagata mativa, i mamoe e fa.***

Ua manino suiga tetele e oo i ai lenei malosi. Ua fesuia'i le faitauga o fuainumera (numbers/quantities); suia mai le tasi, i le faafāina. O le mau'oa o le a faamativaina, o le a vaevae, faaitiitia ma toesea ana oloa; a o le tagata sa mativa, o le a faatuputeleina lona tamaoiga, e faaopopo, pe faatele, le fuaitau o ona manuia. E fesuia'i foi i ona fuatino (sizes/qualities), e suia le tama'i mamoe, i mamoe pepeti ma lapopo'a. O mea laiti ma le tuai, e suia i mea tetele ma le fou. Ma isi suiga tetele, o se faatulagaga fou e faia e le Atua, e ona le paoa silisili, Lē ona le malosiaga uma lava, Lē ana le pule aoao i le lagi ma le lalolagi. O fesuiaiga e faia e Lē e ou le alofa uma lava, e alofagia ai le tagata vaivai ma ua lē alofaina e isi tagata. O faamasinoga foi e fai e le Atua e amiotonu ma faamaoni, na te lē tuulafoa'i le tagata puapuagatia, na te lē tu'ufuaina foi le tagata amio leaga.

Sa manatu Tavita e lilo i lalo lana agasala sa faufau. Peitai, o le Atua e tele ma mamana ana auala, e faailoa ai i le mu tinitini o le la, mea e faia e le tagata i le pogisa. A o le Atua foi e tumu i le alofa mutimutivale, na te faamagalo ai le tagata e salamō faamaoni, ma loto nutimomoia e pei o Tavita. E tāua i le Atua i tatou uma, o ana tama'i

mamoe o i lana lotoā. E ui ina faatauvaa, e itiiti ma matitiva faaleagaga, i le faitau a le lalolagi, a e taulia i le faitauga a le Atua. E tāua ma amanaia, e faamamalu ma aloaia, e maua i le finagalo o le Atua, o tatou tagata faatauvaa, e faatuatua ma auauna ia te Ia.

E ui ina leai so tatou leo i le tele o nofoaga, a e tofia ma faatuina mai e le Atua nisi tagata, ma isi auala, e tula'i atu, ma faia le faamasinoga amiotonu mo i tatou, i le lalolagi nei. E fai isi tagata mo tatou siufofoga, e faaleo ma faatino la tatou finauga. Ina ia tauia ai lo tatou tigaina, ma lo tatou sauāina, ona o Lona suafa. O le paoa lena o le tama'i mamoe ua alofaina. Ina ua aiā le Atua, ua fai lana pule ma lona finagalo. Auā o le Atua e alofa, ma 'au faatasi o Ia ma i tatou. Fai mai le aposetolo ia Roma, "*Afai ua 'au ma i tatou le Atua, o ai e faasagatau mai ia i tatou?*"

Ua talafeagai lenei feau faamanatu mai o le Tala Lelei. Auā, ua tele auala eseese, ua latou sauāina tupulaga, o outou alo ma tatou fanau i nei aso. E toe fafagu mai le pule faa-matua; le paoa ma le pule faa-matai; le pule faa-faia'oga, ma isi mau pule. Ua saisaitia agatatau, taotaomia leo o le fanau. E tapu i la tatou tu ma le aganuu, ona toe tali mai se atalii, pe fautua mai se afafine. E olo le fua, ma alu faalologo, o le tama'i mamoe aunoa se leo ma se manatu. Toe silasila ane i le fa'aogaina o telefoni ma le initaneti. O mea lelei, a e afai tatou te faatamala, e tuusaoloto ma tuulafoa'i fanau e matamata ai i vaaiga matagā, e ono i'uvale ma taunuu ai i mala.

I se isi itu, ua fai tatou ma faata'ita'iga leaga, pe afai e solomua i tatou, le saunoa i le gagana faatupu maseiga, gagana o sauaga, o upu ma tala e faamasino fua, tautuu'ifua, taufaaleaga fua o isi tagata, a o faalogo i ai le fanau. O nisi foi, ua taulamua i le tagofia o fualaau faasaina, le mariuana ma le aisa, ma le tele o soligatulafono, e lamatia lo latou faata'ita'i ma mulimuli ai. E lē gata i lena, a ua noanoatia i latou mai o latou agatatau, e agavaa ai mo faamanuiaga – e pei o a'oa'oga, o le auai i sauniga lotu, o togafitiga, taaloga, faafiafiaga, ma le tele o faamanuiaga e tatau mo i latou. Ua tatou sauaina i latou, i le fai atu, Fai lea e fai atu ai, 'aua lea ou te faia!

---

## TALI MALO MALUA I LE FGFL

Le Ekalesia pele a Iesu Keriso ma le nuu o le Atua, ua faamanatu mai le feau o le Aso mo Tupulaga, lo tatou valaauina, ua tuuina mai i ai le tiute, auā se manuia o alo ma fanau, o tofi mai le Atua. Ia faamalolosi foi i lo tatou tiute faaNatano, ma le leo faaperofeta, e sunu’i ai le sasao fa’aafi o le pule sauā ma le paoa soona fai, i lo tatou lotoifale o faigamalo i nei aso. Ina ia ta’u atu le amiotonu a le Atua, ma lona finagalo paia; auā o lo tatou sāō ma lo tatou gūgū, ua tutusa lava lea ma lo tatou auai atu e faamalosia pea faiga pi’opi’o ma amioleaga. O Natano e aiga ma Tavita, a e le’i aveva lea ma ala na te faalafi pe ufiufi le amioleaga a le tupu, pe ‘alo ese mai le faailoa o le amiotonu a le Atua.

Mo outou tupulaga talavou ma fanau a le Ekalesia, ia manuia le sauni atu mo a’oga o lenei tausaga. A’oa’oga o le poto salalau, ma le A’oga Aso Sa, A’oga Faitau Tusi Paia, A’oga Faitau Pi, Autalavou, tainane Aufaipese, ma a outou auaunaga i tofi ma tiute. Ia faavae i le mata’u i le Atua. Ia fai outou ma sulu e mumū, ia fai ma laau e fua mai, ia fai ma pese e mālīe, e fia faalogo ai, lo outou ola ia Keriso. Ia fai outou ma avefu’a o lou aiga, lou atunuu ma lau EFKS.

Ia outou silafia, o outou o mamoe ua alofaina; o fitafita tau a Keriso, i lana itu’au, e faasagatau atu i le fili o Satani ma ana ‘au. O le itutaua a Keriso, e faasagatau i faiga leaga uma ma faiga faasolitulafono, faiga faapaupau uma; a o le itutaua foi e manumalo. Auā o le itutaua e ta’ita’i’au ai Keriso, le Leoleo Mamoe lelei; o Ia e saoaluma e tau ma le fili, ma puipui i tatou i le taimi lava e tasi. Ia tatou lotu tetele ma faamalolosi, auā afai ua ‘au le Atua ma i tatou, ua tatou manumalo a’ia’i i mea uma, ona o Iesu ua faatasi mai ia i tatou. Na maliu o Ia i le satauro, a e na toe tu manumalo. Ina ia alofaina i tatou uma, ia magalo a tatou agasala, ma tatou maua le ola faavavau. Pe afai tatou te salamō faamaoni mai a tatou agasala, ma faatuatua atoatoa ia te Ia. Ia ia te Ia le viiiga e faavavau. Amene.

**Saunia Faitoaga Tolua FS**  
**Faatonu Sulu Samoa**  
**FNA Ululoloa ma Siusega**  
**MATAGALUEGA FALEATA**

O aso 19 – 22 Ianuari na faia ai le fonotaga a se tasi o lala o le FGFL, le Fono a Sui mai le Pasefika (Pacific Member’s Meeting Forum - MMF), i le laumua o le EFKS, le Kolisi Faafaifeau i Malua. O le manatu autu o lenei fonotaga, Faatasiga i Faaliliuga (Togetherness in Transformation), ma o le uluai fono lea o le faagasologa o fonotaga e ono ua fuafuaina. O le Fono a Sui o le Pasefika, e aofia ai Ekalesia e sefulu o sui o le FGFL (aofia ai le EFKS), ma Ekalesia e lua na auai e mata’itū, silasila ma maitau i taualumaga. O le sauniga lotu e tatala aloaia ai lenei fonotaga, na ta’ita’iina e le susuga Porofesa Dr. Vaitusi Nofoaiga FS, le Pule o le Kolisi Faafaifeau Malua.

O le lauga autu na saunoa i ai Rev. Dr Seforosa Carroll, o le United Theological College of Charles Sturt University i Ausetalia. Na ia tu’u se lu’itau i usufono, i se mafaufauga e “faaliliu le malosiaga e ala i le aveeseina o a’oa’oga faakolone (“transform power” through decolonising education). O le faalauteleina o le mataupu na saunoa i ai Dr. Carroll, na ia fa’apupula ai ni auala se tolu o tu ma aga o le soifuaga faaPasefika, e faailoa ai le tāua ma le faamamafa, o le atamai o tatou tagata: muamua, o le auala o tala faafagogo, e iloa ai le atamai o fesootaiga, fefaasoa’iga ma talanoaga; o lona lua o le auala o matālalaga e mamanu ai ‘ato, fala, ma isi, na te faailo le potopoto faatasi o ituaiga eseese, ma na soloia i lalo pa vaeloto o feeseeseaiga; ma le auala o folauga, na te faailoa le fesootaiga faauluulumatafolau o le laueleele, le vasa ma le vanimonimo.

Na faaopoopo Dr Sudipta Singh, o le Sui Failautusi – Polokalame, a le FGFL; faapea foi le saunoaga a Dr. Mercy Ah Siu-Maliko, o le faia’oga o le Kolisi Faafaifeau Piula, na ia faamamafa le agatutusa o itupa (gender justice). O usufono a le EFKS mo le fonotaga e aofia ai le Failautusi Aoa o le Ekalesia, susuga Dr. Taipisia Leilua FS & Faletua ia Vaisola, le Pule ma nisi Faiaoga Malua, le faletua ia Faafetai Kereta Fuafiva, ma le susuga Mika S. Te’o AM o le Ofisa o Tupe. Malo le usufono, malo le tali malo!

**F. Sulu**

---

## **GALUEGA EFKS VAIALA**

*“O le faamoemoe ua taunuu o le laau o le ola”*

O le masina na te'a nei, a o toe 2 aso aulia le Kerisimasi, na faapaia ai galuega tetele a le EFKS Vaiala o le Pulega Vaimauga Sisifo - o le maota fogafale lua o le faafeagaiga ia Iese ma Siaauli Uele, faapea le Maota tele o le galuega. O le susuga Faalenuu Tagataese FS na ta'ita'ia le sauniga, ina o feagai le susuga i le Toeaina ia Enefatu Lesa FT ma le malologa. Na auai e molimauina lea faamoemoe, le afioga Taitaifono Fono Tele susuga Tunumoso S. Iosia FT, ma nisi sui o le Komiti Faatonu - Aila Patea FT, Fili Sia FT, Pati Vili FT, o le masiofo a lana afioga le Ao mamalu o le Malo, Faamausili Leinafo Tuimalealiiifano, le afaigaluega a le Pulega ma lupe faalele a le afioaga, ma le toatele o le mamalu o le atunuu ma le Ekalesia.

O le susuga i le faafeagaiga na saunoa i le tala ootoo o le galuega, amata mai le aso 18 Novema 2021 na latou tuua ai le maota tuai, ina ua faamaonia ua le saogalemu, ma ua tonu foi o le a faia le maota fou. O le aso 4 Ianuari 2022 na tuu ai i lalo le maota o le a faagasolo le galuega, a e taofia mai e le Ofisa o le Tausi Mavaega, ona o se talosaga a nisi aiga. Peitai o le aso 27/12/2023 na faia ai le sauniga lotu ma amata ai loa le galuega, ina ua mae'a soalaupule ma tau fai finagalo malilie itu uma, aemaise suli ma feoi o le afioga Iosefa Maliuga, ua ofoina lo latou fanua mo le galuega a le Atua. Na mae'a le galuega i le aso 21/12/2024; e 1.56 miliona le tau na fausia ai e le konekarate a le Great Wall Construction. O le maota tele o le galuega o loo fausia lava i lona nofoaga tuai, i le fanua ua foaiina mai e le afioga i le Matua ia Tofaeono ma lona aiga; e 9 masina na fausia ai lea galuega, i le tau e \$350,000.

Na saunoa le afioga Taitaifono Fono Tele e molioo le faafetai ma le faamanuia a le Ekalesia, ma tauaao le meaalofa \$20,000. O lona faletua ia Susana Soliola na ooti le lipine, ona ulufale lea o le mamalu o le auvalaaulia, e molimauina le matagofie o nei galuega, o vavega ua faia e le Alii, e ala i le soifua faatuatua ma osi taulaga i le Atua. Na taualuga le aso i tausamiga ma fa'aalologa masani, i le agaga o le olioli ma fiafia, a o aga atu i le Kerisimasi ma le Tausaga Fou. **(saunia Faatonu Sulu, mai ata a Cuatro Media).**

---

## **A'OA'O TI MALUA, 2025**

*“Ou te faia outou ma faifaiva i tagata.”*

O le su'ega ulufale na faia i aso 13 & 14 Aokuso 2024, o le i'uga na faailoa mai i le aso 14 Oketopa 2024, a o le Ta'utinoga na faia i le aso 14 Ianuari 2025. E to'a 25 A'oa'o na faamanuiaina i le su'ega, a e to'a 24 na talia i le Ta'utinoga na faatautaia e le Komiti o Malua. O i latou ia o le Vasega Tausaga Muamua (T1):

1. Afele & Lotofagamulifusimatanumaleu Fereti, FALEALILI SAFATA SIUMU.
2. Aleni & Faamanuiaga Uelese, APIA.
3. Avei & Talosaga Avei, VAIMAUGA.
4. Christopher Lealiiifano, FALEATA.
5. Fitu & Merelina Fuimaono, MANUKAU.
6. Gasolo & Tusiupu Salima, KUINISELANI SAUTE.
7. Iosefa Tiliga, FAASALELEAGA.
8. Junior Ufi Amituanai, ITU O TANE.
9. Kevin Asotasi, APIA SASA'E.
10. Kupa & Soo Avai'a, MANUKAU.
11. Kuresa & Matauaina Faeteete, LOTOFAGA LEPAALEIPATA.
12. Latai Iakopo Nanai, AANA.
13. Lawrence Jeremiah Sio, KUINISELANI.
14. Luagia & Tineleti Semau, ITU O TANE.
15. Lui Seumaalataua, APIA SASA'E.
16. Mark & Diana Leuluaiialii, VAIMAUGA.
17. Marshall & Jacinta Maua, APIA SASA'E.
18. Shalom Timu, AUKILANI.
19. Sadat & Shanelle Peteru, NIU SILA SUTE.
20. Tagataoletuiatua Tuiavii, APIA SASA'E.
21. Talalelei & Jasmine Solomona, APIA.
22. Jake Ropati, NIUSAUELESE I SISIFO.
23. Joshua Iakopo Milford, AUKILANI.
24. Ulimasao & Siokapesi Fata, VAIMAUGA.

Ua faamoemoe aulia le Aso Lulu, 5 Fepuari 2025, ona a'e lea o le Kolisi ma amata ana polokalame o lenei tausaga. O le Laulau Komiti Malua e ta'ita'iina le sauniga lotu ma le Sakarameta o le Faamanatuga i lea sauniga taua, aulia i le alofa ma le agalelei o le Atua.

O Tusi mo le Su'ega o le tausaga nei 2025: **Feagaiga Tuai - Teuteronomē**, **Feagaiga Fou - Mareko**.

Ia manuia le alo atu o le Kolisi Faafaifeau a le Ekalesia i ana polokalame o lenei tausaga.



---

# O LAU AFIOGA O LE SULU.

## AMATAILE FAAGALO & FAAMAGALO

*Efeso 4, “32 Ia fefaamagaloa’i outou, faapei ona faamagaloina outou e le Atua ia Keriso.”*

Manuia le Tausaga Fou. Malo le malaga manuia mai lena tausaga, lenei ua amata le tatou faiga malaga faalefaatuatua o lenei foi tausaga fou 2025. Pe afai e te finagalo e amata le malaga i se papase’e mafolafola e māmā, faigofie ai ona se’e le vaa o le folauga, ona tuu ese lea o faafatiatama’i ma to’atuga tuai o lena tausaga ua tuana’i, mea o loo latou fai ma avega mamafa ia te oe. Ia faagalo mea leaga ma mea sesē, ma faamagalo ou fili ma i latou sa faatiga ma faamanu’alia lou loto. O le faamagalo, fai mai le alii tusitala Amerika o Filipino Ianesi, o se “faatinoga e lē faalenatura” (an unnatural act). Fai mai lana faamaninoga, ‘E te lē maua ni manuvai (dolphins) e faamagalo ni malie (sharks) i lo latou ‘aina o latou uso ma paaga manuvai, e leai. O le lalolagi lenei, o le taifau-ai-taifau, a e lē o se lalolagi, taifau-faamagalo-taifau.’ O le ita ma le tau ma sui o le lagona faanatura pe afai e faamanu’alia oe. O le faamagalo o se mea faalelagi, e lē se mea faanatura, ma e manaomia ai le alofa tunoa o le Atua ina ia lagonaina ma faatino le faamagalo. Peitai, ua a’oa’o mai Iesu, *Mataio 6, “15 A e afai tou te le faamagaloina atu tagata i a latou agasala, e le faamagaloina foi e lo outou Tama a outou agasala.”*

Fai atu ai foi, e leai se mafuaaga e tasi mo le Atua na te faamagalo ai a tatou agasala, a o agasala na te faamagalo ai i tatou i aso taitasi, e sili ona mamafa nai lo se mea o le a fesiligia ai i tatou, e faamagalo o tatou matua, o ta’itoalua, ma a tatou uo. O la le Tusi Paia, ia fefaamagaloa’i “faapei ona faamagaloina outou e le Atua ia Keriso.” O le faamagalo na te tatala faitoto’a o se falepuipui, o loo avefa ai oe o le **pagota** ma le **leoleo falepuipui**. O le feitaga’i e le gata ina faaeseina oe mai tagata sa fai ma au uo, a e na te faapuupuua foi lou soifua, e ala lea i lona fausia o ituaiga porotini mamate e tutupu ma fesoasoani i le faatupuina o faama’i i le tino.

Na fai atu le isi alii i lana faufautua, “Ou te talosia ia faatasi mai lo’u uso i la’u faaipoipoga, peitai ua tele tausaga ma te le’i toe fesoata’i.” Na fesili

le faufautua, “E faapefea ona tupu lena mea?” Na umi se taimi o faatali, ona tali ane lea o le alii, “E foliga tulaga ese, a e o le upu moni ou te lē o manatua!” O le folau ma nonofo vava mamao o le taunuuga faanatura lena o se mafutaga lē fefaamagaloa’i; a o le faamagaloina na te faia le tuufaafegagai o lena agaiga, e ala i le faamaloloina o faiā malepelepe ma sootaga motusia. O le talitonuga faasaienisi, o le faamagalo atu e faaopoopo ai tausaga o le soifua. Afai e te talanoa ma fesili ia i latou ua silia ma le 80 tausaga, o le a e iloa ai ua latou maua le filemu faalelagi, auā ua latou mafai ona faamagalo ma faagalo. O se amataga lelei foi lea mo le folauga ua fai nei.

## IA FAATAUALE FAAMAONI

*“23 Ua lelei ia, le auauna lelei e, ma le faamaoni,” Mataio 25:23.*

O le tasi lenei o faataoto lauiloa a Iesu, i le alii ma ana auauna, e ta’u foi e nisi o le faataoto i taleni, e mulimuli mai i le faataoto i taupou e toasefulu. O loo amata faataoto i upu, “O ia ona po e tusa ai le malo o le lagi...” O se tasi o a’oa’oga e sili ona malosia o loo faamamafa e Iesu i lenei faataoto, o le tāua o le **faamaoni**. Pe tuuina mai e le Atua ia te oe ni taleni se lima pe sili atu, e lua pe tasi foi, o le itu e sili ona tāua ia te Ia, e lē o le aofa’i o taleni, a o le aofa’i o lou faamaoni; e lē o le tele o taleni, a o le tele o lou faamaoni i le galueaina ma le faatinoga o tiute ma tofi ua tuuina mai. “Ona faia atu ai lea o lona alii ia te ia, Ua lelei ia, le auauna lelei e, ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale mai ia i le fiafia o lou alii.” 25:21. E le’i faapea mai le alii i ana auauna, Ua lelei ia, le auauna “poto ma le atamai”, po o le “auauna lauiloa ma le ta’uta’ua”, pe faapea foi, le auauna “talenia ma agavaa”, a o le “**auauna lelei ma faamaoni**”. Se a lona uiga? O loo fetalai Iesu faasino ia te i latou e masani ona lē amanaiaina ma lē faatāua e isi tagata, a e o i latou ia e sili ona tāua ia te Ia, ma lona malo, le malo o le lagi. O loo Ia talanoa mai ia i latou e auauna ma tautua lē leoa, e lē pei o i latou e ili le pu ina ia iloa uma e tagata a latou auaunaga, e lē pei o i latou e sisi ma fa’aagiagia le fu’a ina ia iloa mamao atu i latou, tagata fia lauiloa i le faatinoga o latou feau. O loo

---

faasino lana faatusa ia te i latou e usu po i le taeao, fa'aaoga taleni ua tuuina i ai e le Atua, galueaina tofi ma tiute ua foa'iina i ai e le Matai. E lē amanaia e tagata, a e o loo silafia manino ma tauia faamanuiaina e le Atua. Aisea? *“10 Auā e lē amiolētonu le Atua, na te lē faagalogaloina la outou galuega ma le alofa ua outou fa'aali mai ai i lona suafa, auā na outou auauna i le au paia, i le o loo outou auauna i ai.” Eperu 6.* O i latou nei ua latou alofia le sulua e le la, a ua fiafia e tautua ma auauna i le ataata. E faamatala ai i latou e le gata ina amata le tausinioga ma le tuuga, a e tamomo'e pea lava i aso taitasi, e lē malolo se'ia latou taunuu i le tini. O le manatu o nisi tagata ia te i latou nei, e lē taulia pe leai foi se esesega o lo latou i ai pe leai; peitai e sili ona taulia i latou i le faitauga ma le silafaga a le Atua. O tagata latou te faitaulia le manuia o se faamoemoe, se atina'e ma se galuega e fua i le potu ma le tamaoiga e maua mai ai; a o le fua faa le Atua, na te fua i lou faamaoni e faatino ai ou tiute, e ui ina itiiti ma faatauvaa.

O le fesootaiga lea o faataoto e lua – taupou & taleni. E iloa le tagata potu i le malo o le lagi, i lona faamaoni e fai lana feau ua valaauina ai e le Atua. Ina ia 'aua le faamasino fua e le tasi auauna le isi uso i le faatinoga o ana feau, a ia silasila ifo pea le faigaluega po o ia faamaoni, i lana ia lava taleni. Ia 'aua foi le ave le umi o i ai i se galuega, e faapea ane ai o ia ua potu, ma ua faamaoni. A ia fai ma viiga o le Matai, lona alofa faapalepale, e ui ina o tatou o auauna faatauvaa, a ua la finagalo e fa'aaoga i tatou mo ana feau paia.

### **O LAULAUFIVA & LAUGUTU**

*“10 Auā o lē fia mana'o i le ola, ma ia iloa aso lelei, soia le tautala lona laulaufiva i upu leaga, ma ona laugutu 'aua le tautalatala faa'ole'ole.”* 1 Peteru 3.

E i ai le paoa i lou laulaufiva ma ou laugutu – o le paoa la te faatupu ai manuia, pe faatupu ai foi manu'a – e faalagolago lea i lou fa'aaogaina. O se tala faatusa ou te faamatala soo, i se tasi tupu na malomaloā lona gasegase, ona saili lea o foma'i popoto e togafitia; sa siliga tali i seu taumafaiga a fomai, ma faasalaina ai i le oti. O se tasi alii foma'i na ia su'esu'e ma fautuaina, o le suasusu o le leona failele, le vailaau e malosi ai le tupu. Na ofoina e le tupu se tau tele mo le tagata na te maua mai le suasusu o le leona failele, ona talia lea e se tasi alii toa. Na alu le alii lenei, ma sa manuia lana taumafaiga na maua ai le suasusu. Na mapu ifo

o ia i lalo o se laau, a o toe foi atu e momoli le suasusu. Ma o iina sa fai ai loa le talanoaga ma le finauga a ona itutino. Ua fai ane le lima, o ia na fasia le leona ma tatau mai le suasusu – e tatau ona sili o ia. Na fai ane le vae, o ia na latou sao mai ai, i lana tamo'e saosaoa. O le mafaufau na finau i lona potu, a o mata foi sa fai ane i lona mataalia. Sa faapena itutino taitasi ona finau malo. Ua galoma atu le finauga, a e faalogoina loa le fai mai o le laulaufiva, “O outou uma e auauna mai ia te a'u, auā e sili lava lo'u aogā.” Na ita ma inoino itutino uma, fai ane e leai sana mea na fai, e le'i i ai sona aogā, na o le nofonofu filemu ma lafi i totonu. Na fai ane le laulaufiva, “Ia ua lelei, o le a outou vaai i ai.” Na taunuu i le tupu, ua avatu le suasusu, ona faapea atu lea o laulaufiva ma laugutu, “Lau afioga a le tupu, o le suasusu lenei o le taifau e ma'i. Na toatama'i tele le tupu, ma faatonu fitafita ina ia ave le alii lenei e fasioti. Ua fememea'i itutino uma ma fefefe, ma aioi i le laulaufiva ma laugutu ina ia tautala sa'o i le tupu, ma lavea'iina i latou mai le oti. “Ou te le'i fai atu foi ia te outou? O outou e auauna uma mai ia te a'u.” Ona toe valaau atu lea o le laulaufiva, “Lau afioga i le tupu, ia malie lou finagalo, o le suasusu lava lenei o le leona failele; a e sa ou fa'aaoga lona ta'u i le gagana Arapi, e foliga tutusa lona faaleoga ma le taifau e ma'i.” Na inu le tupu ma malosi lona gasegase, ma faasaoina ai i latou. I le paoa o le laulaufiva ma laugutu.

Afai e te fia faamaonia pe i ai se paoa o le laulaufiva ma laugutu pe leai, ona faata'ita'i lea ona e muimua ma faaleaga se isi tagata, ma e maitauina ona foliga ma lana tali mai. A uma lena, ona e faia lea o se tala e faaviivii ma ta'uleleia ai o ia, ma vaai pe faapefea ona foliga. Peita'i, aua tatou te talanoa na o aafiaga i isi tagata, a ia silasila ifo i aafiaga o au upu ia te oe lava. Fai mai le Tusi Paia, afai e te fa'aaogaina lou laulaufiva mo le lelei, 'o le a e maua se olaga fiafia ma iloa aso fiafia e tele.'

O se faaitaiga malosi na fai e Iesu: *“23 Auā e moni, ou te fai atu ia te outou, ai sē fai atu i lenei mauga, Ia siitia oe, ma ia lafoina i le sami, ma le lē masalosalo lona loto, a e peitai e faatuatua o ia e taunuu lava mea na ia fai atu ai, ona faia lea mo ia o le mea na te fai atu ai.”* Mare.11.

*(fa'aauau itulau 12)*

---

# ***O LE PEROFETA MULIMULI***

---

*(O le Tala Faafagogo ua FaaSamoaina mai le Tusi, "The Last Oracle", tusia e James Rollins)*

O le limasefulu iata i luga atu o le auala tele, na vaeluaina ai le vao i se mea, ma faasolo saosaoa faasasa'o mai i le fitafita, e pei o le alu a se pomu vaa moulu.

Na taofiofi e Porasakova lana pupula faamaualuga, peitai sa sosolo i totonu o ia se faamalieina e pogisa. Na ia tuua i lalo le tamaloa, ua lē mafai ona toe gaioi, ua aunoa sona puipuiga. O le a ia faauma loa o ia iinei, ia tau i Amerika mo le oti o ana uo i luga o le vaalaa, ia faatigaina o ia; o se pulufana i lona tulivae, atonu ma se isi i lona tau'au.

A o toe laa atu Porasakova, o se leo o iliili save'u na lagona i ona tua, o se musumusua o vaovao minoi, o le feula e pei o le savili.

A e lē o le savili.

Na ia iloa. Na faliu i tua Porasakova. Na amata ona ia tafana lana fana e le'i tū faalelei. Na ia oomi mau le amoti o le fana ma faapā pulu salalau solo a o ia feliiua'i ma taavili. Na lagona se tagi auē ma le 'e'ē malosi faatasi ma le pā pā o pulufana, a o osofai mai Sakara i fafo mai o le vao, ma puna sa'o atu lava ia te ia: o vae faavā lautetele, mati'u'u uliuli ma'ama'ai, o maso ua felea mai i tua a o gū mai ona nifo uumi maamaai. Na o le fana ma toe fana e Porasakova. Na pipisi ma tafe mai le toto mai fulufulu tusitusi o le manu – peitai na ia iloa e leai se mea na te toe taofia le manu feai.

O le ita ma le tiga, o le tau i sui ma le galala, o le tuinanau ma le naunautaiga.

A o iloa e Porasakova nei tulaga matautia, na maoga mai fafo o lona fa'a'it se 'e'ē faataio mata'utia, loloto ma ogaoga, o se tagi o le fefe ma le mata'u.

Ona faapulou lea o ia e le taika ma taofi i lalo i le elele.

Na tu a'e i luga Monike, ma vaavaai atu a o faatama'ia e le taika le tino o le fitafita. Na faamanatu atu ai ia te ia le saeia e le urosa o loko lapopo'a ananafi. Na lagona atu e Monike le gau i ona ponaivi, ma le motu faafuase'i o le leo o le tamaloa. O le tino o le fitafita sa fetoso faatātā solo pei se pepe meataalo, a o pipisi solo le toto. Ua lē lava e Monike ona vaavaai i nei faiga, ona ia oso sa'o atu lea i le taika, o lona vae agavale o loo mu i le tiga ma tafe tototi i le palapala. O le fana a le fitafita na lelea ese mai ia te ia a o tanumia

i lalo o le valu selau pauna o maso ma mati'u'u. Na taatia mai le auupega i le va o le taika ma Monike. Latou te lē sao mai le manu e aunoa ma le fa'aaogaina o le fana.

Na feula atu se gū ia te ia.

Na faasagatasi mata o Sakara ia Monike. I lona fesagaiga pogisa, na iloa ai e Monike o loo manatua o ia e le pusi, o ia na fasia lona uso. Na faatū le taika i luga o le tino o le fitafita, o ona maso ua faamalō, o ona musele ua tutū maualuluga, o ona fulufulu ua faasasa'o i soo se itu. Na tafe mai le palapala mai le fatafatafa o le taika ma ona autafa i ona fulu pulepule. O loo ola le pusi i lona ita.

Na aapa atu Monike i le auupega, tootuli ifo i ona tulivae ma faasino atu le fana. E tasi lona lima na tauivi ai ma le fana, autago solo lona fusipa'u ma tau faasa'o e saili le amoti.

Ailoga a fetau ana gaioga.

Na osofa'i atu Sakara i ona vae i tua ina ia fasioti-a e fetau ma le faalogoia o se isi tagi – o le 'e'e mai a se pusi i le isi itu o le auala. E le'i leotele, peitai na logo mālie ma e tutusa lelei ma le tagi a se taika o ita ma tiga i le manu'a. Na iloa lelei e Monike, na te masani ma le tagi na ia faalogo ai e le'i leva atu teisi.

O le tagi a Akati le uso o Sakara, a o mate o ia.

Na iloa foi e Sakara le leo o le tagi, a o ia oso atu i luga; ona ia faatafiti lea ma taavili e liliu, ma pa'ū ifo ai i lalo o punou ma lona si'usiu o tu sa'o i luga. Na pipisi mai se feula a le pusi sau'ai, ua faaititia le ita, a ua faatetele i le faalētonu ma fememea'i solo.

Na sii i luga e Monike le fana ma ta'i atu i le pulou uamea sa faamau i tua o le ulu o le taika. Na faata atu ai i ona lalo ifo teisi.

O nai sitepu i le isi itu, na faatetele ai le feula a Sakara e aveva ma manavanava o le tiga, o le faanoanoa, o tau saili lona uso ua leiloa.

O le taimi lona na faamaopo ai e Monike lana tu, ma oomi loa le amoti o le fana.

Na pa le fana ma ma'ati lana salalau.

Na autafiti le taika, ona fuli lea ma patatū folasi i luga o le mutia.

Na magoto ifo Monike i lalo, o faalagolago i lona vae. Na ia amo le fana i lona tau'au. Na ia iloa ua sa'o lana fana, sa faata sa'o ma pa tonu i le tuāua



---

o le ulu o le manu. Na ia siaki ifo ona lava manu'a. O le pulufana a le fitafita sa tau i lona ogavae, peitai na ati ma alu atu i fafo.

O le a ola o ia mai lea manu'a.

Na faasosoo le manava a Monike, ona faamalosi lea o lona tu ae i luga.

Na aliali mai Konesetatio ma Kisika i le isi itu o le auala. Na iloa e Monike o lona ola na faasaoina e Kisika le itiiti, mo lana faili ma le tagi faata'ita'i a le taika. O le tagi muamua na ia faalogo ai, na maitau ma faataitai ai e Kisika; a e na faaleotele i le taaiga apa na taai e Konesetatio lea ua tiai atu i le vao.

Na oso mai Marata i fafo ma le fale teu oloa ma faasasa'o i le loli.

O le a latou aumaia Piota ma fa'auau loa. Na setusetu atu Monike, ma na iloilo lelei le lavelave o fale o tuu mai i le auala. Na ia setu atu ia Sakara ma tuu lona lima i luga o le tauau o lavatoto o le taika, ma ofo atu i ai le filemu sa le'i iloa e le manu i lona olaga atoa iinei.

"Alu loa, oe na alii tele, alu e faatasi atu i lou uso."

12.43 taeao.

Uosigitone.

Na tamoe saosaoa atu Penita i lalo i le auala o gaogao agai i fasitepu. Na taalili mai faailoilo, na fuifuilua mai ma sailini Protokoli Alefa. O le aveeseina o tagata mai le nofoaga toe itiiti mae'a. O le ulufafo mo faalavelave, e ui atu i se auala i lalo o le elelee agai i se fale e paka ai taavale. Sa le'i i ai se faaletonu o Penita i le tuu ai e Mapeletope o ni fitafita i nei faitotoa ulufafo, ina ia mautinoa e le'i sola le tamaitiiti. A e o le mea sili, ia o ese tagata faigaluega mai le fale simā i lalo o le elelee.

Tagata uma vaganā i latou na maua i le osofaiga muamua.

Ina ua uma ona seti le fuafuaga mo le saogalemu, na muamua ona afe ane Penita i le upega o fesootaiga o le nofoaga o faatonuga tutotonu ma vaavaai ai i ata vito na pu'e. Na ia iloa ai ua motusia fesootaiga ma fafo, o le faaloga sa i ai nisi na i ai ata faatusa o fesootaiga, a e peitai na latou tuua laina faalotoifale ia matala. Mai meapueata o le fogafale i luga, na ia vaaia ai le au fitafita a Mapeletope o latou pu'ea se taseni o

tagata faapagota, ma saisai o latou tapulima i manoa una i o latou tua.

E ono sili atu le leaga. I lenei itula ua leva, ua gaogao le aufaigaluega a Sigima. Ua malie le loto o Penita, ua uma ona sauni e Penita mea na ia manaomia, ma ina ua uma, ona ia faasaga ane lea i le matautia o sili ona latalata i lona fatu. Na ia tatala faafuasei le faitotoa i fasitepu ma toe itiiti lava a ia taia le nofoaga o Kati Parani.

Na ia tauaveina Sasa i ona lima.

Na taumafai malosi Penita e faavasega.

O tua atu o Kati, na ia iloa atu ai Malakoma Ieni ma se leoleo sikulakī.

"O le ā? E faapefea?" na ia tau faasenunui atu ai. Na tulei faavāvā atu Lisa ia Malakoma ma faanatinati atu ia Penita. O Lisa sa ufitia i le palapala. Na tatavale le fatu o Penita, peitai e foliga mai e le'i manu'a o ia. Na fusi atu lima o Lisa ia te ia ma opo atu. Na lagona e le alii le toe to'a filemu o le tamaitai, faapei foi o ia – ona laua toe faavalavala lea.

"O le a le mea na tupu?" na fesili ai Penita.

Na fesootai atu Kati i ona tamatamailima pupuu ma le vaivai, ma faauma atu, "O loo matou taumafai e o ese mai le nofoaga."

"Tou te lē taitai mafai ona o ese i fafo ma Sasa," na ia fai atu ai. "O loo leoleoina uma faitotoa."

"O le a la se mea e matou te fai?" na fesili ai Lisa.

Na vaai Penita i lana uati e siaki. "Ia, o lo outou sosola ese i la outou lava taumafaiga, ua outou faafaigofie ai lo'u olaga." Na ia faasino atu i tua. "Ave Sasa i le potu e teu ai mea i le fale koleni. Ia faamautu ma saogalemu ai o ia iina. Outou uma."

"A e faapefea oe?" na fesili ai Kati.

Na sogi atu Penita i le alafau o Lisa, faasaga atu i le faitotoa, ma alu atu i fafo. "E i ai le mea mulimuli e tasi ou te fia faia – ona ou faatasi atu lea ia outou."

"Ia e faaeteete," na fai atu ai Lisa.

Na valaau atu Kati i tua ia te ia. "Faatonu! O loo ola pea Monike!"

Na tu Penita, tepa atu i tua, peitai ua tapuni le faitotoa. O le a? Sa le'i i ai se taimi na te fesiligia ai le uiga o le tala a le tamaitai. O le a faatali sei i ai se taimi. Na ia tamoe i lalo o le fale ma toe foi i le mea na ia amata mai ai, i tua i le upega o fesootaiga. Na ia siaki lemu le ea. O se faalogona suamalie na sasala i

---

le nofoaga, e pei ona sa tatau ai i nofoaga faatonutonu tutotonu uma.

O se vaega muamua o le polokalame o le toilalo-saogalemu: le fafagaina atu o kasa faatupu afi i le 'ea. E alu ai le sefululima minute seia aulia le laasaga aupito ogaoga. Ma e ui ina saogalemu le manavaina o le ea mo nai itula, a e latou te le'i maua lena umi. I le isi sefulu minute, o le toilalo-saogalemu o le a faa'emoina ni aloiafi i soo se faavae ma amata ai se afā o afimumū i vaega uma o le faatonu tutotonu. O le aloafi o le a emo mo le na o ni nai sekone, e fafaga atu e kasa faatupu afi, ona fufulu uma ai lea o le laualuga atoa o le fale simā. Ona pipii tosina mai ai lea o isi kasa, ma sasao ai le mumū saesae.

I totonu o le upega o fesootaiga, na siaki ifo ai e Penita le faasologa o tv, o loo taliaina ata pu'e mai meapueata i soo se laasaga.

Na ia vaavaai solo seia oo ina ia maua le masini o loo ia sailia. Na fa'aali mai ai Mapeletope o loo tu i autafa ane o Seana Makenaiti. Na ia uu le fana ma tuu i le tua o Seana. O tua ane o i laua, na amata ai ona gasolo ese fitafita i lalo i le faitotoa matala o fasitepu.

Na eueu atu e Penita le ki o le leo o le meapueata. "– o se faiga faamanu," na fai atu ai Seana. "E lē mafai ona e fesuiaina faapea polokalame o faasalalauga. E te manatu e mafai ona e faia se osofaiga e faaumatia ai se isi vaega, ona e toe taumafai lea mulimuli ane e soloi ese faamaumauga?"

"Na ou faia muamua," na gu ane ai Mapeletope. "Na o se mataupu lava o le sailia o faai'uga e faafetaui ma le soliga tulafono."

"I nisi upu, o le faai'uga e ta'uleleia ai le auala," na tomumu ai Seana. "E te lē mafai ona e sola ese ma nei mea. E toa lua ua feoti."

"Na o le pau lena? E pei ona sa ou fai atu, ua uma ona ou faia soo le mea lenei. I fafo ma iinei." Na faafelavei atu Penita i le talanoaga a le toa lua. Na ia tautala atu i le faaleoteleleo ui atu i sipika sa i le fola. "Mapeletope!"

Na osotu le tamaloa i le te'i, a e na tuu pea lana fana o sauni. Na ia vaai solo ma su'e meapueata, ona ia maua lea o le meapueata i le puipui. Na ia toe faasagatonu, o ona laugutu faasiasia. "Oi, Faatonu, o lona uiga e te le'i tuua le fale e pei o isi o le tou vaega. Lelei tele. O le a tatou faai'u faavave loa lenei mea. Aumai i luga nei le teine, ona leai lea o se isi e toe manu'a."

Na tautala atu Penita i le faaleoteleleo. "Ua uma ona matou aveesea lau tamaloa, Mapeletope, ma ua natia le teine i le mea e te lē maua ai."

"Oi e moni?" Na fai atu ai Mapeletope a o ia sinifi i le ea. "Ou te vaai atu ua uma ona e faaolaina le polokalame o le toilalo-saogalemu."

Na lagona e Penita se maalili. Ua maua e le tamaloa, e le na o faatusa o fesootaiga faavae; ua oo lava i le a'a o latou faatautaiga. Na lapataia o ia e Seana faasino ia Mapeletope. O le manu lenei ua pa'i ona tamatamailima i soo se mea, o se apogaleveleve uliuli ua saasaa i totonu o le upega tafailagi. O ana faatinoga suauua faafoliga mananaia sa natia ai ni fuafuaga faalilolilo e sili atu le matautia.

"Ma ou te talitonu ua uma ona e setia le taimi i le siro tasi le selau," na fai atu ai Mapeletope, ua faamaonia ai le loloto o le tulaga ua oo i ai lona silafia. "Na matou lē mafaia ona tatala le faailoilo e taofi ai, peitai e i ai se mea na ia ta'u maia ia te au, matou te lē manaomia. Auā o loo i ai tagata e toa luasefulu o loo ou taofia faapagota i luga. Luasefulu alii ma tamaitai o tou aiga. O loo i ai o outou aiga, toto ma aano i tua atu o nei puipui. Ou te taofi e leai sou mafaufau ma sou lototele, e feoti ai i latou nei, e fasiotia i lou lava lima. A o a'u –"

Na sii a'e i luga e Mapeletope lana fana, tuu atu i le tuāua o Seana.

"– e leai so'u popole i ai."

Na faapa e le tamaloa le fana. Na pa le fana laulogo ai sipika faaleoteleleo.

Na pa'ū ifo Seana i ona tulivae, ma palasi ifo ai taatia i le fola.

Na faalogo atu Penita i lona fatafata ua fufusi, ua le mafai ona ia manava. Na logo lona tino i le lē talitonu. O se vaega o lona mafaufau na faapea ifo o le a alo ese Seana, ma taumafai e alofia le osofaiga. Peitai sa faapea foi ona faafuase'i, le osofaia o lona tino atoa i se matagi o le mu vela ma aasa. Na faate'ia o ia i le sauā ma le faalētonuga o le tamaloa.

E lē pei o lona fili.

Na toe foi mai le leo o Mapeletope. "O le a matou o atu e aumai le teine, Faatonu. Ma e leai se isi na te taofia i matou."

7 Setema, 10.38 taeao  
Piripaiatu, Ukureni.

---

Na faamau e Karai le fusipa'u uliuli i luga o le peleue Rusia mo galuega i fafo, e lanu meamata tutusa ma le vaomatua. Na ia faamau lelei foi lana tu i totonu o seevae kamupusi. Na togi atu e Koualasaki se pulou gaosi i fulufulu o manu. Na ofi lelei togiga na gaoia mai, a o le toniga a lana paaga na toetoe a masae mai i ona pitoofu. O fitafita Rusia e toa lua, e ana toniga ua toina ese mai, na tiute i luma o le falepuipui. Sa faateaia i laua, ma pu'ea faafuase'i aunoa ma se faafitauli, ma toesea ai a la'ua toniga.

“Ta o,” na fai atu ai Karai ma savali agai i se uila afi.

“O fana,” na valaau atu ai Koualasaki.

Na tepa atu Karai, ma na iloa ai o le tamaloa sa le'i talanoa atu i se auupega. Na i ai a la'ua fana Rusia fasioti tagata AN-94.

Na vaai atu Koualasaki i le taavale sa pipii i le uilaafi IMZ. “Ua leva ona ou manao e tietie i se uila-taavale faapea,” o lana tala lea a o oso atu i luga i le taavale o matala.

Na sui e Karai lana fana i le isi ona tauau ma lafo atu le vae i luga o le nofoa o le uilaafi.

Toe itiiti ane, ona ia faaola lea le uila ma faaleo tele, ona la feosofi atu lea i le faitotoa o pa o le fale puipui tuai, ma o atu ai i fafo i auala vaoa o Piripaiatu. Na siaki e Karai lana uati.

Ua luasefulu minute. Na ia punou atu i luma, oomi ma faamasau le vae penisini, ma faasaosaoa atu i le aai ua pefua ma elea. Na taei solo asuemu ma nutiga tioata lamatia ai pa'u o le uilaafi. O pioga uma na latou fetai ai ma faafitauli; o taavale leaga ua lafoa'i, o meafale ua limulimua, e oo lava i mea fai faili na paepae solo i le auala.

E ui i le tele o gaogaosā, ae na faasaoasaoa lava e Karai lana uilaafi, o nisi pioga na liliu ai toetoe lava a mafuli ese ai le taavale o pipii i le uila. Na gatete ma faataio Koualasaki i le tele o taimi. Na laua pasia ni fitafita o tiute i le auala, na latou sii mai le lima po o le fana a o laua felele ai atu; o nisi taimi na iloa atu e Karai mata o se tagata mai totonu o tioata ta'ei, o se gaoi pe faalafuā i totonu o le aai.

Ina ua taunuu i tuaoi o Piripaiatu, ona faasaoasaoa atu lea o Karai agai i le tafailagi, a o feosofi ese ni aila se tolu mai le leotele o le pasika. Na ia faasagatonu aga'i i le faaputuga o afi tetele o maualuluga mai. E ui ina leo tele le afi ma le pa'ō o le pasika, a e na ia lagona atu leo o tagata mai masini ma sipika faaleotele leo o sau mai le nofoaga. E tusa o le tala a Matesone, o loo fuafua ma fafau e Senatoa Nikolao Solokova se osofaiga i

e o loo potopoto iinei latou te molimauina le tapunia ma faamaufaailogaina o le afi i Kerenopili.

A e o le ā le peleni a le tamaloa? O le a le Gaioga Uranusa?

A o saosaoa atu Karai i luga o se auala asuemu fou, na ia vaavaai atu i le tuputupu a'e o le nofoaga ma fausaga Kerenopili o i luma atu. Na tosina ona mata i se fausaga e pei o se faleoo faapuloulou lapotopoto lapo'ā fausia i apa sa tu i le isi itu. O le fale uamea faapuloulou na suluia ma atagia mai ai le susulu o le la e pei o se faata. Ma, sa gaioi. E pei o se suauu i luga o le suavai, le susulu o le la i luga o fafo o lona faapuloulou. Na ia tapuni lemu atu i luga o le afi Kerenopili. O le tele o le nofoaga e mafuli i simā efuefu ma ona laualuga ua fufulu faasinasina, peitai i le tasi pito, na aliali a'e ai se tasi o fausaga tele, ua vali uliuli e pei o se nifo ua mate. O le faailoga lena o le tuugamau o le afi numera fa, o se Sarakofagusi maoa'e uliuli. O le faleoo faapuloulou taavalevale, sa matala le isi pito, na faamoemoe na te foloina le nofoaga i lalo o lona faapuloulou tele.

A o la'ua latalata atu, na faasolo mafaufauga o Karai i nisi o mea e mafai ona tutupu. O Atipale Poleki sa lilofia ma aafia tele i le malosia o kasa vevela ma le oona, masalo o iinei sa maua atu ai. Po o le a lava le fuafuaga a Nikolao i lana peleni o fia fai, o se fuafuaga e aafia ai le afi tuai. E leai se isi mea e sagatonu ma foliga mai e fetai.

Na lapatai mai Matesone o le a maualuga le puipuiga a sikulakī e leoleoina autafa o le tulaga mo lauga, aemaise lava ona o le toatele o malo fa'aaloaloga ma le au mautofi faavaomalo.

O tulaga saunia mo lauga sa faatulaga e taatitia tusa ma le kuata maila mai le afi. Na fefulisa'i e Karai po o fea le auala na te ui ai: e aga'i i le tulaga mo lauga, po o le afi. E faapefea pe afai e sesē lona manatu i le afi? Pe mata o i ai se pomu o tatao i se isi mea i le tulaga mo lauga?

A o masau atu le pasika i le laolao i le va o Piripaiatu ma Kerenopili, na taia i lana faalogo le leo o faasalalau, e logologoā ma oolo, sa faailoa ai le ogaoga o faalapotopotoga niukilia i le lalolagi fou. Sa le'i taumate Karai i le leo lea. Na masani ona auai o ia i mea e fai i le Fale Pa'epa'e. O le leo o le Peresetene o Amerika.

*(Soso'o atu i le Sulu Samoa Fepuari 2025)*

---

# ***O LAU AFIOGA O LE SULU***

***(mai le itulau 7) (Laulaufaiva & Laugutu)***

O le a le uiga o lea fetalaiga a Iesu? E mafai ona e talanoa e uiga i lou faafitauli, pe e te talanoa i Lē na te mafai ona foia lou faafitauli. E mafai ona e faitio ona o le faafitauli, pe e te tatalo mo le faafitauli. E mafai ona e talanoa e uiga i lou faafitauli mai le vaai faaletagata, e faamamafa ona lavelave uma, pe e te talanoa foi faasino i ai, mai le itu faalelagi, ma faamamafa le paoa o le Atua na te suia ai aafiaga ma tuatuagia. E mafai ona e faateteleina le atuatuvaletale ma faapea ane, 'E telē tele le faafitauli, e leai se mea e mafai ona fai.' Pe e te tuuina atu le faafitauli i le Atua ma fai ane, "20 O lenei, ia ia te Ia o Lē na te mafaia ona faia o mea uma e faasilisili lava i mea tatou te ole atu ai ma mafaufau i ai, e tusa ma le mana o loo matuā galue i totonu ia te i tatou." Efe.3. Pe afai e tautala lou laulaufaiva ma ou laugutu i na upu, e lē gata o loo e fa'aaogaina le paoa foafoa o le Upu a le Atua, a e o loo e fa'aaogaina foi lou laulaufaiva ma ou laugutu i le auala sa'o.

## ***TĀUA O LE TOATASI MA LE ATUA***

*"23 Ua tuuina atu e Ia le motu o tagata ia ō, ona maliu a'e lea ua na o ia i le mauga e tatalo ai." Mata.14.*

O Iesu sa tagata toe Atua. Talu ai ona e mafuli lo tatou manatu ia te Ia o le Alo o le Atua, e sili atu nai le manatu o Ia o le Atalii o le Tagata, o le ala lea e tele foi ina tatou misia a'oa'oga e tele mai lona soifuaga faaletagata. Ina ua fafagaina e Iesu le motu o tagata e limagaafe, sa faailoa manino ai lona mana ma lona malosi paia faaleAtua (Mataio 14: 13 – 21). A e ina ua uma lena vavega ofoofogia, ua tatou vaia ai lona itu faaletagata i ni auala e mafai ai ona tatou ta'ufaatasia ma Ia. Na mae'a ona uunai atu e Iesu ona soo ia muamua atu i le isi itu o le vai, ma tuuina atu le motu o tagata ia latou o, ona maliu atu lea o Ia i se nofoaga tuufua i le mauga ina ia toatasi na o i la'ua ma le Atua. Mo le toatele o i tatou, pe afai e uma se vavega tele ma le ofoofogia faapenei, ona sami loa lea ma fa'aali le fiafia tele e ala i taumafataga ma fa'aaloaloga, o siva ma pese ma faafiatiaga. Ma o le toatele foi o i latou o i o tatou tafatafa, o le a umi se taimi e lē malamalama pe aiseā na Ia tuuina atu ai i

latou ia o ese. Peitai, sa malamalama lelei Iesu o lona mana sa le'i maua mai i le motu o tagata, a e na maua mai lona Tama, o le ala lea o lona taumafai malosi ina ia maua se taimi avanoa e la te mafuta ai na o i la'ua. O le faiā sootaga a Iesu sa fai ma lona Tama, o se ata manino foi lena o lou faiā ma so'u sootaga, o se tatou faiā e mafai ona fai ma le Atua. Ma e 3 upu e faamatalaina ai:

- (i) Vāvālalata. "20 Auā o loo alofa le Tamā i le Atalii, ua fa'aali mai foi e Ia ia te ia mea uma lava e faia e Ia;" Ioa.5.
- (ii) Faalagolago. "19 E lē mafai e le Atalii ona fai o se mea, na o ia lava; a o mea na te vaai atu i le Tamā o faia; o mea foi o faia e Ia, o loo faia foi ia lava mea e le Atalii."
- (iii) Usitai. "30 Ou te lē mafaia ona fai o se mea e tasi, na o a'u; ...auā ou te lē usiusitai i lo'u lava loto, a o le finagalo o Le na auina mai a'u."

Pe afai tatou te fia maua le mafutaga vavalalata faaleagaga ma le Atua, e tatau ona faaositulaga mafutaga i le tino ma isi tagata. Sa tuli ese e Iesu ona soo ma le motu o tagata, o le mea e tatau, ina ia mafai ai ona la toatasi ma le Tamā. O ai nisi e tatau ona e tuli ese, a o a foi ni mea e tatau ona e tuu ese, ina ia mafai ai ona oulua mafuta vavalalata ma fai sootaga ma le Alii? E taua lo tatou mafuta vava lalata ma isi tagata, a e sili ai ona taua ma aoga pe a faamuamua ona faamausali, le mafanafana o la tatou sootaga ma le Atua.

A o tatou feagai ma le tele o feau o aso taitasi, e pisi foi i faalavelave ma tuatuagia tatau ai, e ao lava ona tatou iloa mea e tatau ona ave i ai le faamuamua, aua pe afai tatou te maua muamua le sootaga ma le Atua, o a mea faalelalogi e tutupu mai, tatou te mautinoa ua ia i tatou le mana ma le malosi, le alofa ma le taitaiga a le Atua, e mafaia ai soo se mea tatou te manana'o i ai. E tutupu vavega i o tatou olaga, i le fesoasoani ma le faatasi mai o lo tatou Alii.

---

## ***E TĀUA OE!***

*“7 A o outou lauulu lava ua faitaulia uma ia.”*

Pe afai e te fia silafia le telē e lē mafaatusalia o le Atua, ona faitau lea o le Isaia 48, *“13 O lo’u lima foi na faavaeina ai le lalolagi, ma lo’u lima taumataua na folasia ai le lagi; ou te valaau ia te i latou, ona latou tutu faatasi mai lea.”* E tatau ea i se Atua matautia ma le silisili, ona anoano mai e amanaia ou faafitauli ninii o aso taitasi ma ou mafatiaga? O le upu moni, Ioe! E ui ina o le Atua e telē, a e na te faatāua lou faatauva. *“E le faataulia ea manu iti e lima gafua i asari e lua? E leai foi so latou e tasi ua galo i luma o le Atua. A o outou lauulu lava ua faitaulia uma ia. Aua tou te matatau; ua sili outou i manu iti e tele.”* Lk 12. E tāua i le Atua manu iti – e sili atu nai lo le tatou iloa. Na te fafaga i latou, faa-avanoa laau e mapu ma saogalemu ai, o lālā laau e fai ai o latou faamoega, ma isi manu iti latou te tatafao ma latou fai paaga. O lona faatauaina o i latou ma tasi lelei i ai, na te faitauina ai pea lo latou faitau aofai i taimi uma. A e faapefea oe? *‘A o outou lauulu lava ua faitaulia uma ia.’* Pe afai e tāua ia te oe se tagata, e te maitauina ma faitaulia le auiliili o mea uma e uiga ia te ia. Pe afai e fanau mai se pepe, o le a le mea a matua e fai pe a vaai i o latou tamatamailima ma tamatamaivae i le taimi muamua? Latou te faitauina. Ma e latou te faitauina pea i tausaga taitasi, a o latou tuputupu a’e seia oo ina matutua. O taimi uma e taunuu mai ai i le aiga ua misi se lima po o se vae, po o se isi lava faaletonu i le fanau, e iloa lelei ma maitauina e matua. E oo lava i matua e tau lē lava le malosi ma le iloa, latou te iloa gofie lea tulaga. E peisea’i o loo fetalai mai Iesu, ‘O le Atua e lē na o outou tamatamailima ma tamatamaivae na te faitaulia. O lona alofa tele ia te outou, na te faitaulia ai ma lauulu e tutupu i o outou ulu. Na te silafia le tulaga o i ai, i aso uma, a o outou tutupu a’e. Na te silafia o latou lanu, ma lo latou fesuaiga. Fai mai le Faataoto 16, *“31 O le pale matagofie le ulusinā, pe a ua i ai i le ala o le amiotonu.”* E faitauina e le Atua le tuputupu a’e i la le tino, aemaise le faatupulaia atili o lana amiotonu. O le satauro o Keriso o le faailoga e faamaonia ai le alofa silisili o le Atua ia i tatou; e faamaonia le tāua o i tatou taitoatasi ia te Ia, faatasi ma le auiliili o mea uma e tutupu i lo tatou olaga.

---

## ***NA O IESU E MALIE ATOATO A I***

*“A o sē inu i le vai ou te avatu ia te ia, e lē toe fia inu lava ia...”* Ioa.14.

O le fafine sa feiloai ma Iesu i le vaieli, e toalima ana tane sa i ai, ese mai ai le tamaloa o loo la’ua mafuta i le taimi nei. Na taumafai lenei fafine e fesuisuia’i ana paaga i se taumafaiga e faamalie ai le gaogao sa i totonu ia te ia. Peitai, e le’i manuia lea auala ma lea taumafaiga, ma e lē manuia foi mo oe ma soo se tagata na te uia. E faapea foi i le tulaga o le taumafai e a’e i luga i le apefa’i o tauiviga, faapea foi le tulaga o le faaputuina o ituaiga oloa, po o le taumafaiga e saili le lauiloa ma le ta’uta’ua. Na fetalai Iesu i le fafine, *“O lē inu i lenei vai e toe fia inu ia.”* Pe afai e te i totonu o le toafa aunoa ma se vai, e i ai le taimi e amata ai ona e iloa atu ai ni vaaiga ma foliga, ma e te talitonuina o ni mea moni, peitai e leai. E faapena lou agaga. Pe afai e umi se taimi o aunoa oe ma le vai moni, ma fa’auau ai le mātūtū ma le mago o lou agaga, ona amata lea ona e saili ma autago solo atu i mea e faafoliga, o mea e lē moni, mea e lē mafai ona latou faamalieina lou galala. E le’i toe lagaina mai e Iesu le olaga tuai ma le tuana’i o le fafine ina ia faamasiasi ia te ia. E tasi lava le mafuaaga na la ta’ua ai, ina ia faamaonia ai lana mau: ina ia ta’u atu ai ia te ia, na te mafai ona faamalolo manu’a o lona olaga tuai, ma avatu ia te ia le faamoemoe mo se lumanai e sili atu ona lelei. Ma sa faapena lava ona Ia faia. E le gata sa Ia faaliliuina lona olaga ia lelei, a e na avea foi lenei fafine o le uluai soo e avatu le Tala Lelei i Samaria. Atonu o loo e manatu e pei o le fafine utuvai, ua siliga tali i seu sou faamoemoe ma se faaolataga mo lou agaga. Sa le’i faapena Tavita, a o le tagata na mulilua a e toe ufiufi i le fasioti tagata. Sa le’i faapena foi Peteru, a e na ia faafitia le Alii. O Toma sa le’i faapea foi, e ui ina o loo manatua pea o ia o le masalosalo vale. A e a Paulo, sa le’i faapena, ma sa ia fasiotia le toatele o Kerisiano a e le’i avea o ia ma Kerisiano foi. O ou manaoga lē faamalieina, ma lou galala lē utufia, e avea ma faaopopo (malosiaga), a e lē o ni toese (vaivaiga), pe afai e te avea ia mea, latou te ta’ita’iina oe i aao o Iesu. O lana folafolaga po o lana poromisi lenei mo i tatou: *“14 A o sē inu i le vai ou te avatu ia te ia, e lē toe fia inu lava ia; a o le vai ou te avatu ia te ia, e avea i totonu ia te ia o le vaipuna, e puna i luga i le ola faavavau.”* Ioa.4.

---

## 'AUA LE FIU!

*"1 O le mea ma lona tausaga i mea uma, ma ona lava po i mea uma lava i lalo o le lagi;" Failauga 3.*

Fai mai Solomona, "o ona po e fanau mai ai, ma ona po e oti ai; o ona po e totō ai, ma ona po e lia'i ai le mea ua totōina; o ona po e fasioti ai, ma ona po e fofō ai; o ona po e lepeti ai, ma ona po e ati a'e ai; o ona po e tagi ai, ma ona po e 'ata'ata ai; o ona po e taufaitagitu'i ai, ma ona po e sasa'a ai; o ona po e lafoai ai maa, ma ona po e faapotopoto ai maa; o ona po e feasogi ai, ma ona po e lē feasogi ai; o ona po e saili ai, ma ona po e tuu ai ua leiloa; o ona po e tausi ai, ma ona po e lafoai ai; o ona po e saei ai, ma ona po e su'i ai; o ona po e faalologo ai, ma ona po e tautala ai; o ona po e alofa ai, ma ona po e inoino ai; o ona po o le taua, ma ona po o le nofo lelei." *Faila. 3: 2 – 8.*

O le aofaiga o nei aso, e 28 ituaiga 'taimi' eseese, i ona aso ma tausaga e tutupu ai. Peita'i e maitauina ua lē ta'u mai e Solomona se taimi e *fiu ai!* *pe solomuli pe faavaivai ai!* Tau lava ina tatou tutū ai pea lava i luga o le malae o le taua, ona faasaga ane lea o le Atua e liliu o tatou tulaga pagatia, ma aumai le manumalo ia te i tatou. Pe afai o loo e popole ma atuatuvaile i le tulaga o i ai lo oulua aiga faaleulugalii, ua lamatia la oulua faaiipoipoga, o la oulua fanau, o lo oulua soifua maloloina, o a oulua teugatupe ma nogatupe, o a oulua galuega o auauna ai, e oo lava i lo oulua lumanai, ia 'aua le fiu e taumafai, 'aua le fiu e tatalo ma faamoemoe.

Ia 'aua le fiu e faalagolago ma faamoemoe i le Atua. O se poloaiga lena e mafai ona e tū tū mamau ai: *"17 O auupega uma e faia e tau ma oe e lē manuia ia; o laulaufaiva uma e finau atu ia te oe i le faamasinoga e te faasalaina ia; o le tofi lena o auauna a le Alii, o a latou amiotonu foi mai ia te au lea, ua fetalai mai ai le ALII."* *Isa. 54* E le'i fetalai mai le Atua, o le a leai ni auupega e faasaga tau mai ia te oe, peitai na Ia folafola, o na auupega e lē manuia, e lē manumalo. O le mea lea, 'aua e te fiu gofie! 'Aua e te fiu, auā o le taimi e uma ai lou malosi, o le taimi tonu lena e amata ai le mana o le Atua.

---

## MANASE & EFARAIMA

*"51 Ua faaigoa e Iosefa lana ulumatua o Manase...ua ia faaigoa foi i le aupito ane i ai, o Efaraima."*

Pe afai e faafetaiai oe e puapuaga o le olaga nei, pe aveeseina se tasi e pele ia te oe, e te lagona le ogaoga o tiga tutui ma le faanoanoa; ma se'i vaganā ua e saili fesoasoani, e mafai e ia puapuaga ona taotaomia oe i lalo seia oo lava ina e matuā faataotolia i le pipili, faaletino, faalemafaua ma faaleagaga. Ma afai e te faamamafa i tiga o le tuana'i, o le a lamatia ai foi ma lou mauaina o faamanuiaga o loo ua saunia e le Atua mo lou lumana'i. Pe afai sa i ai se tagata sa tele ni mafuaaga e tatau ai ona atuatuvaile ma lafoa'i ia toilalo, ona manatua lea o Iosefa le atalii o Iakopo. Mai lona itiiti sa lotoleagaina e ona uso, sa inosia ma itagia, na lamatia seia oo ina maua le avanoa, ona taupulepule lea e fasioti, a e na faatau o se pologa. Na oo i Aikupito feagai ai ma faaososoga, pelogia ma tuua'i pepeloina, falepuipui ma faagaloina.

E faapefea ona sao mai Iosefa i nei puapuaga uma? I le Kenese 39, o loo faamauina e faafa le fuaitau, *"Sa i ai le ALII ia Iosefa" (f.2, 3, 21,23).* O le i ai i lou loto ma lou mafaua o se lagona o loo faatasi le ALII ma oe, o le a mafai ai ona faamalosi ma faatumauina oe i taimi faigata. Na iloa e Iosefa, o le faagalo ma le faamagalo, nai lo le saga taofiofi mamau ai pea i lagona e fesootea ma ona puapuaga, o le auala lea na te faasaoloto mai ai o ia, mai maea e saisaitia ai o ia. O le auala foi lea e faatulaga ai o ia, ina ia na maua faamanuiaga o le lumanai. Ua lē avea le tuana'i, e lamatia ai le lumanai. E faapefea ona tatou iloa lea mea? Auā sa ia faaigoa ai ona atalii e toalua. *"Ua faaigoa e Iosefa lana ulumatua o Manase, auā ua faapea ane ia, 'Ua faia e le Atua ina ia galo ia te au lo'u tiga uma atoa ma le aiga uma o lo'u tamā. Ua ia faaigoa foi i le aupito ane i ai, o Efaraima, ua faapea ane ia, Auā ua faauluolaina au e le Atua i le nuu na puapuagatia ai a'u."* O ai na fesoasoani ia Iosefa e faagalo tiga na faia e lona aiga ia te ia? O le Atua! O le a se mea na fesoasoani tele ia te ia e manumalo ai i faiga pi'opi'o ma amiolētonu a isi tagata? O lona lagonaina o le faatasi mai o le Atua ia te ia. Ma, e faapena foi ona faia mo i ta'ua. O lana folafolaga, *"2 A e sopoia atu le vai, ou te ia te oe; a e sopoia atu vaitafe, e le lofia ai oe; a e savali i totonu o le afi, e le mu ai oe..3 Auā o a'u o le ALII lou Atua..."* *Isa 43.*

**(F. Tolua)**



---

# O E UA FAI I LAGI FOLAUGA

## SEUMANUTAFATA AKEREI

### SALESA

(26/6/1949 - 9/1/2025)

O le afioga i le Tiakono o le EFKS Vaivase tai, Vaimauga; na soifua mai le Aso Sa, 26 Iuni 1949, a e na valaauina e lona Matai i le Aso Tofi, 9 Ianuari 2025; ua 75 tausaga, 6 masina ma le 15 aso o lona soifua. O le Afioga i le Tiakono ia Seumanutafa ma lona aiga, o se tasi o Matafale faavae o le Aulotu a Vaivase-Tai i le tausaga 1967, lea e o'oi mai lava i le taimi nei, o loo auuina ai lava ma lona aiga. E tusa ai ma faamaumauga o le Api o le Galuega, o le Fonotaga faaletausaga a le Aulotu i le tausaga 1977, na filifilia ai Seumanutafa e avea ma Taitaipese. A o le Fonotaga faaletausaga i le 1978, na filifilia ai o ia e avea ma Komiti o Fanua & Fale a le Aulotu.

O Seumanutafa o se tasi o sui faavae o le Mafutaga Tama a lenei Aulotu, ina ua faavaeina lenei mafutaga i le tausaga 2023. O Seumanutafa foi sa faauuina i le uluai sauniga faapitoa mo Penisione a le matou Aulotu ia Tesema 2019, mo i latou uma ua aulia tausaga e 70. Sa maua lona Tusi Pasi, o lana faasolo, faatasi ai ma le Hamper ma le meaalofo tupe e \$200. O le faamoemoe o lea sauniga i tausaga taitasi, ia amanaia ma aloaia le auunaga a soo se tasi o le aulotu, ua aulia le 70 tausaga o le soifua.

O se Tamā sa fai ma siliaga i le faatofalaiga ma le sailiga tofa a le Aulotu i ana fonotaga faale-ekalesia. E fa'aaloaloga ma amanaia e le aulotu sona finagalo fa'aalia i soo se mataupu e saausi i ai finagalo fa'aalia. O se Tamā e toaga i le lotu i Aso Sa, e tiga lava ona faaletonu ona aao, a e toso mai lava le wheelchair a Seumanutafa i le lotu. O lana tala, toe pau a lea o le mea la e aogā ai, na o le sau i le lotu, ua leai ma se feau a le aiga o toe aogā i ai.

O ona toe sauniga na faia i le 10.00am, Aso Tofi 16 Ianuari 2025, i le malumalu a lana Ekalesia EFKS Vaivase-Tai. O le Susuga ia Ailani Tanielu (FS) na faaulufaleina lona sa, o le Faitauina o le Tusi Paia sa fofogaina e le Susuga ia Malotau Lafalafoga (FS), a o Talosaga sa faaleoina e Faatoia

Malele AF. Sa molimau lana uo mamae ia Tupa'i Mau Simanu ma lona atalii ia Situfu Salesa, a o a'u sa ta'ita'i ma saunia lona molimau faaleagaga faapea ma le feau faamafanafana.

Sa filifilia ai le Tusi o le faasinoga a le Tusi Faitau Aso, *Kolose 2:6-7*, "*O lenei, faapei ona outou talia o le Alii Keriso Iesu, ia maua outou ma ia faatumauina i le faatuatua, ia faatele ma le faafetai.*" Sa faatauaina ai pea le mafauauga faaleagaga o lea aso, Tauiviga a le alofa (Love's struggle). O le faalototele i lea aso, o le tauiviga a le alofa sa lagonaina e Paulo, o le lagona alofa foi lena o le aso fiafia o lana auuina. O le a le lagona alofa? Talofa e, po o a lava faigata, po o a lava tiga, po o a lava mafatiaga e feagai ma lo tatou ola, e pei foi ona fuli mai le tua o Seumanutafa, 'aua nei manatu ua tuulafoaiina i tatou e le Keriso toetu. A ia tumau ma maua'lo tatou faatuatua ma le lotu talitonu i le Kersio Toetu.

Afai ua tatou mafatia, ootia ma vaivai, pe solo lelei o olaga, pe fetai'i ma faafitauli, pe fiafia foi poo le faanoanoa, ia aua lava, aua lava nei faavaivai ai le tauiviga i lo tatou ola talitonu, ma le faatuatua faamaoni i le Atua. O tauiviga lena a le alofa. Aua tatou te atuatuva pe faatuatua itiiti, o loo soifua le Keriso Toetu, ua uma ona la faatoilalo le oti ma le tuugamau, o le toe fili o le tagata, ua mae'a foi ona la saunia le ola fou, mo e ua faatuatua faamaoni ia te ia. Pei a ona tautino le Aposetolo o nuu ese, (*2 Korinito 5:8*) "*ua matou lototetele ma ua sili lo matou manao, ia o ese i matou i le tino, a ia nonofo i matou ma le Alii.*"

Na maea ona toe sauniga, ona lagomau lea i lona oliolisaga tumau i lona maota ma lona aiga i Vaivase-Uta. Ma faai'u ai lona aso fiafia i osiga taulaga e ala i taumafataga ma fa'aaloaloga faaleaganuu, o pelega a aiga ma fanau, mo le tama, le uso ma le auuina Tiakono a le Atua. Ia faamanuia atu le Atua.

Manuia lau malaga Seumanutafa Nonumalo Akerei Salesa.

*Saunia susuga Seilala Seilala (FS)*

*EFKS Vaivase-Tai*

*VAIMAUGA*

---

**O TOA UA MALILIU, UA FAI I LAGI LE FOLAUGA**

**Susuga Toeaina Faatonu AANA,  
NOMENETA SIMANU FT**




**Susuga FAAU'UGA MATAUTIA FT,  
TOEAINA PENISIONE, FALEATA.**



**Susuga IAKOPO POUFA PESALELI FS  
EFKS Frankston, VITORIA.**



**Afioga SEUMANUTABA  
NONUMALO MATUAOTOFIGA  
AKEREI SALESA**



**Seumanutaba Nonumalo  
Matuaotofiga Akerei Salesa**

26th June, 1949 - 9th January, 2025